

31 DEC 1999

MAHATHIR SERTAI WARGA KOTA SAMBUT ALAF BARU

KUALA LUMPUR, 31 Dis (Bernama) -- Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohamad Ali malam ini menyertai berpuluh-puluh ribu rakyat Malaysia dalam acara sambutan alaf baru.

Dr Mahathir dan Siti Hasmah menghadiri sambutan Bintang Millennium anjuran YTL Group di sepanjang Jalan Bukit Bintang dari Jalan Raja Chulan hingga ke persimpangan Jalan Sultan Ismail, di sini.

Dalam ucapan ringkas, Dr Mahathir berkata beliau gembira mendapati kebanyakan warga kota dan rakyat asing menyertai acara sambutan.

"Saya berasa amat gembira melihat begitu ramai penduduk KL berkumpul di sini untuk menyambut tahun baru, abad baru dan alaf baru.

"Saya berharap semoga kamu semua menikmati kegembiraan pada abad dan alaf baru ini," kata beliau dengan mendapat tepukan gemuruh daripada hadirin.

Yang turut hadir ialah pengarah urusan YTL Tan Sri Francis Yeoh.

Para tetamu dihiburkan dengan persembahan oleh penyanyi tempatan termasuk Zainal Abidin dan persembahan muzikal yang menampilkan penyanyi solo terkenal dunia Michael Ball dan Gillian Humphreys dengan diiringi oleh Orkestra Simfoni Itali.

Dr Mahathir dan Siti Hasmah kemudian beredar untuk menghadiri satu lagi acara sambutan di Kuala Lumpur City Centre (KLCC), yang menempatkan Bangunan Berkembar Petronas, bangunan tertinggi di dunia.

-- BERNAMA

JAY FAZ